



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

"MENYAMBUT RAMADAN"

9 April 2021 / 26 Syaaban 1442

الْحَمْدُ لِلَّهِ¹ الَّذِي بِنِعْمَتِهِ تَمَّ الصَّالِحَاتُ، وَبِفَضْلِهِ تَنَزَّلُ الْخَيْرَاتُ وَالْبَرَكَاتُ، وَبِتَوْفِيقِهِ تَتَحَقَّقُ الْمَقَاصِدُ وَالْغَايَاتُ. أَشْهَدُ أَنْ لَا إِلَهَ إِلَّا اللَّهُ، وَحْدَهُ لَا شَرِيكَ لَهُ. وَأَشْهَدُ أَنَّ مُحَمَّدًا عَبْدُهُ وَرَسُولُهُ لَا نَبِيَّ بَعْدَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ² وَعَلَى آلِهِ وَصَحْبِهِ الْمَجَاهِدِينَ الطَّاهِرِينَ. أَمَّا بَعْدُ، فَيَا أَيُّهَا الْحَاضِرُونَ، أُوصِيكُمْ وَإِيَّايَ بِتَقْوَى اللَّهِ³ وَطَاعَتِهِ لَعَلَّكُمْ تُفْلِحُونَ. قَالَ اللَّهُ تَعَالَى: أَعُوذُ بِاللَّهِ مِنَ الشَّيْطَانِ الرَّجِيمِ: يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِنْ قَبْلِكُمْ لَعَلَّكُمْ تَتَّقُونَ⁴ (Al-Baqarah ayat 183)

Sidang jemaah yang dirahmati Allah,

Marilah kita meningkatkan ketakwaan kepada Allah SWT dengan penuh keyakinan dan keikhlasan melakukan segala suruhan Nya, dan meninggalkan segala larangan Nya. Mudah-mudahan kita menjadi insan beriman dan bertakwa, serta selamat di dunia dan di akhirat. Sempena kedatangan bulan Ramadan Al-Mubarak, mimbar pada hari ini akan membicarakan khutbah bertajuk: "Menyambut Ramadan".

Kaum Muslimin yang dirahmati Allah,

Alhamdulillah, kita bersyukur atas nikmat rezeki yang berkat, nikmat tubuh yang sihat, dan nikmat-nikmat lain yang dilimpahi ILAHI yang tidak terhitung oleh manusia. Tanpa kita sedari, semua nikmat ini, dilimpahi ILAHI untuk membolehkan kita dapat beribadah kepada Nya. Insyaa-Allah, dengan rahmat ILAHI, kita akan menemui bulan yang penuh rahmat, bulan yang sangat berkat dan bulan yang diluaskan pintu keampunan, iaitu bulan Ramadan Al-Mubarak, bulan yang umat Islam diwajibkan berpuasa. Firman Allah SWT dalam surah Al-Baqarah ayat 183 yang bermaksud:

¹ Memuji Allah

² Selawat ke atas Nabi Muhammad SAW

³ Pesan Taqwa

⁴ Ayat Al-Quran



"Wahai orang-orang yang beriman, diwajibkan atas kamu berpuasa sebagaimana diwajibkan ke atas orang-orang sebelum kamu, supaya kamu bertakwa".

Amalan berpuasa selain bukti ketakwaan ummah menjunjung Rukun Islam, semakin terbukti memberi pelbagai manfaat kepada kesihatan tubuh badan manusia, antaranya pengurusan berat badan, menangani masalah tekanan darah tinggi, penghadaman, membantu menurunkan kadar gula dalam darah, menurunkan kolesterol serta menurunkan lemak, selari dengan hadis daripada Sayidina Abu Hurairah Radiyallahu'anhu bahawa Nabi SAW pernah bersabda:

صُومُوا تَصِحُّوا

Maksudnya: Berpuasalah kamu, nescaya kamu akan sihat. (Hadith riwayat At-Tabarani 8312)

Sama-samalah kita memenuhi Ramadan dengan menambah amal ibadah, merebut fadilat, pahala dan ganjaran yang dijanjikan oleh Allah SWT. Antara persiapan yang boleh kita lakukan pada ambang kemunculan Ramadan ialah:

Pertama: Banyakkan berdoa agar kita diberikan usia yang sihat berupaya menyempurnakan sebanyak ibadah.

Kedua: Banyakkan beristighfar, memohon keampunan ILAHI atas segala dosa yang kita lakukan sama ada secara sedar atau tanpa kita sedari, secara sengaja atau tidak sengaja, agar hati dan jiwa kita sebersih kain putih ketika melangkah masuk ke bulan Ramadan.

Ketiga: Mengulang kaji, memahami dan menghayati hukum hakam berkaitan pelbagai ibadah yang dianjurkan untuk dilaksanakan sepanjang Ramadan agar kualiti ibadah dapat ditingkatkan.

Keempat: Memastikan kecergasan jasmani dengan menjaga kesihatan, melakukan riadah dan mengamalkan pemakanan yang berkhasiat lagi seimbang.

Kelima: Menyediakan minda dan mengukuhkan keyakinan bahawa perintah puasa yang merupakan ujian daripada Allah SWT, insya-Allah dapat kita tempuhi dengan baik selaras dengan janji Allah yang terkandung dalam surah Al-Baqarah ayat 286:

لَا يَكْلِفُ اللَّهُ نَفْسًا إِلَّا وُسْعَهَا لَهَا مَا كَسَبَتْ وَعَلَيْهَا مَا اكْتَسَبَتْ



Maksudnya: Allah tidak membebankan seseorang melainkan apa yang terdaya olehnya. Ia mendapat pahala kebaikan yang diusahakannya, dan ia juga menanggung dosa kejahatan yang diusahakannya.

Sidang jemaah yang dirahmati Allah,

Umat Islam juga dinasihatkan merancang ibadah yang mahu dilaksanakan sepanjang bulan Ramadan dengan mengimbasi perkara-perkara berikut:

Pertama: Mengambil iktibar amalan Rasulullah SAW, para sahabat dan ahli keluarga baginda yang menghidupkan Ramadan dengan menambah ibadah seperti bersolat sunat, membaca Al-Quran, berzikir, berjemaah di masjid dan berqiamullail.

Kedua: Memperbanyakkan amalan bersedekah. Sayidina Abdullah Bin Abbas Radiyallahu'anhuma menceritakan sikap dermawan Rasulullah SAW kala tibanya bulan Ramadan:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ أَجْوَدَ النَّاسِ، وَكَانَ أَجْوَدُ مَا يَكُونُ فِي رَمَضَانَ حِينَ يَلْقَاهُ جِبْرِيْلُ، وَكَانَ يَلْقَاهُ فِي كُلِّ لَيْلَةٍ مِنْ رَمَضَانَ فَيُدَارِسُهُ الْقُرْآنَ، فَلَرَسُولُ اللَّهِ صَلَّى اللَّهُ عَلَيْهِ وَسَلَّمَ أَجْوَدُ بِالْخَيْرِ مِنَ الرِّيحِ الْمُرْسَلَةِ
(رواه البخاري 4743)

Maksudnya: Rasulullah SAW ialah orang yang paling dermawan. Dan baginda bertambah dermawan dalam bulan Ramadan. Jibrail menemui baginda setiap malam pada bulan Ramadan untuk mengajarkan Al-Quran. Kedermawanan Rasulullah SAW melebihi angin yang berhembus.
(Hadith riwayat Al-Bukhari 4743)

Ketiga: Bersifat pemaaf dan penyabar.

Keempat: Tidak menyediakan, tidak membeli dan tidak mengambil makanan secara berlebihan hingga berlaku pembaziran dan bercanggah dengan tujuan sebenar amalan puasa diperintahkan.

Kelima: Melaksanakan tugas harian seperti biasa kerana berpuasa tidak harus dijadikan alasan untuk kita tidak melaksanakan tanggungjawab dan tugas yang telah ditetapkan.



Muslimin yang dirahmati Allah,

Menjelang 1 Ramadan, marilah kita berazam menjadikan ibadah puasa tahun ini sebagai ibadah puasa terbaik dalam sejarah usia kita. Ambil lah peluang bertemu Ramadan, dengan memohon sebanyak-banyak keampunan ILAHI, melipat gandakan amal ibadah, bersifat pemaaf dan pemurah dan mengamalkan cara hidup sihat. Isilah ruang waktu dan usia yang kita miliki dengan melakukan perkara-perkara kebajikan, kerana belum pasti kita dapat bertemu lagi bulan Ramadan pada tahun akan datang. Mudah-mudahan kita dapat melaksanakan amal ibadah dengan sempurna dan diterima oleh Nya, serta mendapat ganjaran dan keampunan daripada Allah SWT. Amin Ya Rabul Alamin.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁵ عَلَى إِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ عَلَى سَيِّدِنَا مُحَمَّدٍ⁶ وَعَلَى آلِهِ وَأَصْحَابِهِ وَسَلَّمَ تَسْلِيمًا كَثِيرًا أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁷ وَكُونُوا مَعَ الصَّادِقِينَ.

Kaum muslimin yang dirahmati Allah,

Mimbar menyeru para jemaah agar kita tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, hingga ke hari ini. Jagalah hubungan dengan Allah SWT dan sesama manusia. Makmurkanlah rumah Allah dengan istiqamah mengerjakan ibadah dan solat fardu berjemaah.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁸

⁵ Memuji Allah

⁶ Selawat ke atas Nabi Muhammad SAW

⁷ Pesan Taqwa

⁸ Ayat Al-Quran



اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ، اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ⁹، وَأَصْلِحْ ذَاتَ بَيْنِهِمْ وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ،
وَتَثَبْتَهُمْ عَلَى مِلَّةِ رَسُولِ اللَّهِ ﷺ. اللَّهُمَّ أَعِزِّ الْإِسْلَامَ وَالْمُسْلِمِينَ. اللَّهُمَّ انصُرِ الْإِسْلَامَ
وَالْمُسْلِمِينَ فِي فَلَسْطِينَ، وَفِي كُلِّ مَكَانٍ وَفِي كُلِّ زَمَانٍ. اللَّهُمَّ ادْفَعْ عَنَّا الْبَلَاءَ، وَالْوَبَاءَ،
خُصُوصًا وَيَرُوسَ الْكُورُونَا، وَالْغَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ، عَن بِلَدِنَا
هَذَا خَاصَّةً، وَعَن سَائِرِ بُلْدَانٍ عَامَّةً.

Ya Allah, berkatilah hamba-hamba Mu yang melaksanakan tuntutan zakat dan menghulurkan wakaf, kurniai mereka rezeki yang berlipat ganda, serta sucikanlah harta dan jiwa mereka. Jauhkanlah golongan fuqara dan masakin daripada kekufuran serta lindungilah mereka daripada kefakiran yang berpanjangan.

Ya Allah, berilah kami kebaikan serta keberkatan di dunia dan di akhirat. Peliharalah kami daripada seksa dan azab api neraka.

Ya Allah, kurniakanlah taufik dan hidayah Mu ke atas Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah al-Maghfur-lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

فَيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾. فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

⁹ Doa Untuk Kaum Muslimin